



Nunatsinni ujaqqanik pinnerasaasiassanik aatsitassanillu katersisinnaanermut kiisalu annikitsumik aatsitassarsiorluni ujaqqanik piiaanissamut akuersissummik tunniussinissamut inatsisitigut immikkut aalajangersaanissamut UPA 2017-imi suliniuteqaqqullugit Naalakkersuisut inatsisartut aalajangiiffigisassaattut siunnersuut.

(Inatsisartunut ilaasortaq Anthon Frederiksen, Partii Naleraq)

Inuit Ataqatigiinniit siunnersuuteqartoq Anthon Frederiksen qutsavigiumavarput siunnersuummik soqutigintumik qaqitsimmat.

Nuna namminiilivinnissaminut siunnerfeqartoq innuttami piginnaasaannik nunaminnullu kivitseqataajumallutik tunniukkumasaanik aqutissiuussisuussalluni pisussaaffeqarpoq. Inuit Ataqatigiinniillu isumaqarpugut naalakkersuinikkut siunnerfiussasoq, annikitsunik aatsitassarsionernik ingerlatsinerit, soorlu pinnerasaasiassanik piiaanerit inuit maani najugallit inorsinnagit periarfissaasariaqartoq.

Inuit Ataqatigiinni ilisimavarput nunatsinni ujaqqat pinnerasaasiarineqartarnerat misilittagaqarfigineqarluareersoq, ukiunilumi kingullerni nunaqqatitta ujaqquerinermut misilittakkaminnik piginnaasaminnullu inerisaanerit soqutigalugu qanimut malinnaaffigalutigu.

Nunaqqaterpassuatta ujaqqanik pinnerasaasiassanik piiaallutillu silisillaqqissuunerat maani nunami illersorluartariaqarparput taamatullu suliaqartortagut sinaakkutinik pitsaasunik periarfissittariaqarpagut.

Ullumikkut inatsisip atuuttup ajoraluartumik najugaqavissunut periarfissiinera amigarpoq. Allaammi ima paasineqarsinnaalluni avataaneersunik salliutitsisoq. Tamanna allanngortittariaqarparput. Imaanngitsoq avataaneersunik mattussissasugut, kisiannili maani nunami najugaqavissut suliaminnullu pikkorissut annertunerusumik salliunnissaat inatsimmik allannguinitigut aqutissiuuttariaqaripput Inuit Ataqatigiinniit takusinnaagatsigu.

Nunarsuarmi pinnerasaasiornernik misilittakkat aallaavigalugit upperaarput maani aamma suliffissanik amerlasuunik pilersitsisoqarsinnaasoq. Nunarpummi tassuuna periarfissagissaarmat aqqissuulluakkamillu ineriartortikkutsigu nunatsinni suliffissaqartitsinermi pingaarutillit ilaattut inissimalersinnaanera periarfissaalluorsoralutigu.

Taamak oqaaseqarluta aaliangiiffigisassatut siunnersuut taperserparput ataatsimiitsitaliamullu susassaqartumut ingerlateqqillutigu.